

### Headlines

- 1 बन्ने आले जिले पुंछ च कल वायु सेना दी कानवाई पर होए दे आतंकवादी हमले दे सिलसिले च सुरक्षाबलें केई लोकें गी पुच्छ-गिच्छ लेई हिरासत च लैत्ता ऐ। सुरक्षाबलें आस्सेआ तपाशी अभियान बरोबर जारी।
- 2 लोकसभा दे 5में गेड़ दे चुनां लेई नामांकन वापस लैने दा कल खीरी ध्याड़ा ऐ। इस गेड़ तैहत जम्मू-कश्मीर दी बारामूला ते लद्दाख दी इक्कली सीट लेई बी मतदान होना ऐ।
- 3 मुख् चुनां आयुक्त होरें 75 अंतरराष्ट्री डेलीगेटें गी लोकसभा चुनाएं दी बक्ख-बक्ख प्रक्रियाएं बारै जानकारी दिती ऐ।
- 4 विदेश मंत्री डॉक्टर एस. जयशंकर होरें आखेआ ऐ जे पाकिस्तान दे नजैज कब्जे आले जम्मू-कश्मीर दा इलाका बी भारत दा अननुदृ हिस्सा ऐ।

<><><><><><>

### J&K-Poonch

सुरक्षाबलें कल संझा बन्ने आले जिले पुंछ च भारती वायु सेना दी कानवाई पर होए दे आतंकवादी हमले दे सिलसिले च पुच्छ-गिच्छ लेई 6 मकामी लोकें गी हिरासत च लैत्ता ऐ। इस हमले च भारती वायु सेना दे 5 जोआन ज़ख्मीं होई गे हे जिंदे चा इक नै मगरा इलाज दरान दम त्रोजी दित्ता। आकाशवाणी दे जम्मू संवाददाता मुजब शक ऐ जे इनें मकामी लोकें हमले गी अंजाम देने आहले आतंकवादिएं दी मदाद कीती दी होई सकदी ऐ। पुंछ जिले दे सुरनकोट इलाके च शासत्तर आले जंगलें दे नेडे कल संझा आतंकवादिएं भारती वायु सेना दी कानवाई पर उस्सलै घात लाइयै हमला कीता जिसलै ओहू सनाई टॉप बक्खी जा करदे हे। वायु सेना दी इस गड्डी पर आतंकवादिएं तकरीबन 30 राउंद दागे हे। इलाके च तैनात राश्ट्री राईफल्स दे मकामी फौजी युनिटें पास्सेआ इलाके च घेराबंदी ते तपाशी अभियान चलाए जा करदे न ते इस हमले गी अंजाम देने आले आतंकवादिएं दी धर-फगड़ लेई चलाया गेदा अभियान अज्ज दुए रोज बी जारी ऐ। तोआई पुंछ च होए दे आतंकवादी हमले दे बाद रियासी ते एहदे कन्नै लगदे इलाकें च सुरक्षा बवस्था निग्गर करी दिती गेई ऐ। जम्मू गी पुंछ कन्नै जोड़ने आली राश्ट्री जरनैली शिडक पर बी सुरक्षाबलें दी बाददू तैनाती कीती गेई ऐ।

<><><><><><>

### IAF-Tributes

भारती वायु सेना नै पुंछ सेक्टर च आतंकवादिएं दी गोलीबारी च शहीद कारपोरल विक्री पहाड़े हुंदे परिवार आलें कन्नै गैहरा दुख ते हमदर्दी प्रगट कीती ऐ। वायु सेना दे सोशल मीडिया पर इक पोस्ट च आखेआ गेआ ऐ जे वायु सेना प्रमुख एयर चीफ मार्शल वी.आर चौधरी हुंदे सने वायु सेना दे सब्बै कर्मी देसै लेई सर्वोच्च बलिदान देने लेई श्री पहाड़े होरें गी नमन करदे न।

<><><><><><>

### Withdrawal-Date

लोकसभा दे 5में गेड़ दे चुनां लेई नामजदगियां वापसा लैने दा कल खीरी ध्याड़ा ऐ। जम्मू-कश्मीर दे बारामूला लोकसभा हल्के ते लद्दाख दी इक्कली लोकसभा सीट लेई इसै गेड़ तैहत 20 मई गी मतदान होग। मेदवार कल 6 मई संगारें दपैहरी 3 बजे तगर रिटर्निंग अफसर हुंदे दफ्तर च अपना नामांकन वापस लेई सकदे न। नामजदगी आले कागदें-पत्तरें दी जांच दे बाद हुन 23 मेदवार चुनां मैदान च न जिंदे च साबका मुख्मंत्री ते नेशनल कांफ्रेंस दे उप-प्रधान उमर अब्दुल्ला ते साबका मंत्री सज्जाद गनी लोन बी शामिल न। लद्दाख च 5 मेदवारें दे नामजदगी आले कागद-पत्तर दुरूस्त पाए गे न जिसले के 3 मेदवारें दे नामांकन रद्द बी करी दित्ते गेदे न। लद्दाख सीट लेई जेडे मेदवार चुनां मैदान च न, उंदे च बीजेपी दे ताशी ग्यालसन ते कांग्रेस दे सेरिंग नामग्याल शामिल न। इंदे अलावा 3 अजाद मेदवार मोहम्मद हनीफा जान, सज्जाद हुसैन कारगिली ते काचो मोहम्मद फिरोज बी चुनां मैदान च न। तोआई, इस म्हीने दी 7 तरीक गी मुख् दे 10 राज्यें ते 1 केंद्र शासित प्रदेश दिएं कुल 93 लोकसभा सीटें पर त्रीये गेड़ तैहत वोट पोआए जाने न।

<><><><><><>

### CEC-Deligation

प्रमुख निर्वाचन आयुक्त राजीव कुमार होंरें अज्ज नमीं दिल्ली च 75 अंतरराष्ट्रीय प्रतिनिधिं गी भारत च होआ करदे लोकसभा चुनावं दे बक्ख-बक्ख पैहलुं बारै जानकारी दिती। 23 मुल्ले दे चुनावं प्रबंधन सरबंधि निकाएं दे प्रतिनिधिं गी संबोधित करदे होई उनें दस्सेआ जे दुनिया दी सब्बनें शा मती अबादी आले ते सब्बनें शा बड्डे लोकतंत्र च किस चाल्ली सुतंत्र, निर्पक्ख, पारदर्शी, जवाबदेह ते बवस्था आले ढंगै सिर चुनावं प्रक्रिया गी तोड़ चाढेया जंदा ऐ। चुनावं आयोग नै इनें प्रतिनिधिं गी लोकतंत्र दे महापर्व गी दिक्खने ते समझने लेई साद्दा दित्ते दा हा। अज्ज इनें प्रतिनिधिं, इंदे लेई लोआए गेदे पैहले कार्यक्रम च शिरकत कीती। इंदा भारत दे 6एं राज्यें, महाराष्ट्र, गोवा, गुजरात, कर्नाटक, मध्य प्रदेश ते उत्तर प्रदेश दे केई लोकसभा हल्के दा दौरा करने दा कार्यक्रम ऐ।

<><><><><><>

### Special Poll Station

कश्मीरी विस्थापितें लेई राहत ते आबादकारी दे कमिशनर डॉक्टर अरविंद कारवानी होंरें उधमपुर च खड्डेरे गेदे विशेष मतदान केंद्र च कश्मीरी विस्थापितें लेई कीते गेदे चुनावी प्रबंधें दी समीक्षा कीती। आकाशवाणी दे जम्मू संवाददाता दी रिपोर्ट मुजब कश्मीरी विस्थापित मतदाताएं लेई जम्मू, उधमपुर ते दिल्ली च विशेष मतदान केंद्र बनाए गेदे ना। एहदे अलावा उंदे कोल डाक राहें वोट पाने दा विकल्प बी होग ते एहदे लेई उनें गी पैहले फार्म-12 सी भरना होगा। श्रीनगर लोकसभा हल्के लेई 13 मई गी, बारामूला हल्के लेई 20 मई गी ते अनंतनाग राजौरी हल्के लेई 25 मई गी वोट पोआए जाने ना। एहदे शा पैहले पिच्छले हफ्ते डॉ. कारवानी होंरें दिल्ली च 4 थाहरें ते जम्मू च 21 थाहरें पर बनाए गेदे विशेष मतदान केंद्रें पर जाइयै उथे उपलब्ध सुविधाएं दा जायजा लैत्ता। उनें मतदाताएं गी ते खास करियै पैहली बारी मतदान करने आलें गी अपील कीती जे ओहू पक्क गै वोट पाने दी अपनी जिम्मेदारी निभान।

<><><><><><>

### Ghazipur-LG Kuberrath

जम्मू-कश्मीर दे उपराज्यपाल मनोज सिन्हा होंरें अज्ज गाजीपुर च श्री कुबेरनाथ राय यादगिरी लेक्चर च हिस्सा लैता। इक महान निबंधक, विद्वान ते कवि श्री कुबेरनाथ राय होंरें गी श्रद्धांजलि भेंट करदे होई एल.जी होंरें आखेआ जे राष्ट्र निर्माण ते साहित्य दी दुनिया च उंदा योगदान कदें भुल्लेया नेई जाई सकदा। उनें आखेआ जे हिंदी साहित्य च श्री कुबेरनाथ राय सदा इक प्रेरणादायक बुद्धिजीवी रेह ना। मनोज सिन्हा होंरें आखेआ जे उंदे कम्में गी होरने खित्तें लेई मती शा मती भाषाएं च अनुवाद कीता जाना लोडचदा तां जे होर दुइयां भाषा बोलने आले बी उंदे साहित्य गी जानी सकन।

<><><><><><>

### EAM-Jaishankar

विदेश मंत्री एस. जयशंकर होंरें अज्ज आखेआ ऐ जे पाकिस्तान दे नजैज कब्जे आला जम्मू-कश्मीर दा इलाका बी भारत दा अननुदृष्ट हिस्सा ऐ ते इस बारै भारती संसद च बकायदा इक प्रस्ताव पास होए दा ऐ। उनें आखेआ जे लोकें गी एह सच्चाई भुलाने दी कोश्ट कीती गेई पर भारत ते लोक इस बारै हुन परतिए पूरी चाल्ली सुर्त च ते जागृत होई चुके दे ना। जम्मू-कश्मीर चा दफा 370 गी ढहाने बारै गल्ल करदे होई एस. जयशंकर होंरें आखेआ जे इसी क्या चिर पैहले ढहाया जाई चुके दा होना लोडचदा हा, कीजे जदूं तगर दफा 370 वजूद च हा, बक्खवाद ते अत्तवाद दी भावना बी बरकरार रक्खी जा रदी ही। दफा 370 हटाने दे आलोचकें गी संबोधित करदे होई उनें आखेआ जे एह इक आरजी बवस्था ही जिस हटाना गै हटाना हा। उनें आखेआ जे जम्मू-कश्मीर च दफा 370 इस करिए लागू रेहा कीजे एहदे पिच्छे केई लोकें दे निजी मफाद ऐ।

<><><><><><>

### Shrine-Board

कश्मीर दे सेहत सेवाएं सरबंधी डरैक्टर डॉ. मुश्ताक अहमद राथर ते श्री अमरनाथ श्राईन बोर्ड दे अधिकारिए कल बालटाल बेस अस्पताल दा दौरा लाइयै उथें श्री अमरनाथ जी दी यात्रा लेई सेहत सरबंधी तैआरिए दा जायजा लैता। डॉ. राथर होंरें सरबंधत अधिकारिए गी आखेआ जे ओहू इस गल्लै गी जकीनी बनान जे इस सलाना यात्रा लेई लोडचदे मानकें स्थाबै गै सब्बनें

बंदोबस्तें ते तैआरिएं गी तोड़ चाढेया जा। तोआई जम्मू दे डिप्टी कमीशनर सचिन कुमार वैश्य होरें औंदी श्री अमरनाथ जी दी यात्रा लेई यात्री निवास भगवती नगर च कीती जा'रदी तैआरिएं दा व्यापक जायजा लैता ऐ।

<><><><><><>

### Highway-Samba

औंदी श्री अमरनाथ जी दी जात्तरा दिएं त्यारिएं दे सिलसिले च सांबा दे जिला विकास कमिशनर अभिषेक शर्मा, एसएसपी ट्रैफिक रूरल विनय कुमार ते भारती जरनैली सड़क प्राधिकरण दे डिप्टी मैनेजर ईश गुप्ता होरें जरनैली सड़क पर यात्रा दौरान प्रबंधें दा जायजा लैता। इस बारै आकाशवाणी कन्नै गल्ल करदे होई डी.सी साम्बा अभिषेक शर्मा होरें आखेआ।

<><><><><><>

### Train

जम्मू आवा रदी इक रेल गड्डी दा इंजन अज्ज पंजाब दे सिरहिंद च अपने डब्बे कोला बक्ख होई गेआ। एह घटना उस्सलै पेश आई जिसलै गड्डी सिरहिंद रेलवे स्टेशन परा चलना शुरू होई। जानकारी मुजब एह इंजन कोई त्रै किलोमीटर तगर इक्कला चलदा गेआ। उत्तर रेलवे दे डिविजनल मैनेजर नवीन कुमार नै घटना दी जांच दा हुक्म जारी करी दिता।

<><><><><><>

### White Water Rafting

रियासी जिले च चिनाहू दरेया पर वाइट वाटर राफ्टिंग दा नंद लैने लेई मुल्ख भरै थमां साहसिक खेड्डें दे शौकीन इत्थे औंदे न। एहदा आयोजन लगभग साल भर चलदा रौहंदा ऐ जेदे नै इत्थे सैलसफा च बी बाद्दा होंदा ऐ टकोहदा करिए साहसिक सैलसफा च बी। इस बारै स्हाडे संवाददाता कन्नै गल्ल करदे होई इक सैलानी।

<><><><><><>

### Rangyug

जम्मू च रंगमंच गी बढावा देने ते इस माध्यम राएं समाजी बदलाव आनने दे कम्मै च लगगे दा रंगयुग अपनी 40मीं बरे गंड मनाने जा रदा ऐ जेदे तैहूत इन्ने लेई कार्यक्रम इस सिलसिले च आयोजित करने दा कार्यक्रम तैयार कीता ऐ। इस बारै अज्ज जम्मू च इक प्रेस कांफ्रेंस गी संबोधित करदे होई रंगयुग दे संस्थापक दीपक कुमार होरें इस बारै तफसील मीडिया गी दिती। इस मौके पर संगठन दे मिम्बर, कत्थक दी नामवर नृत्यागना डॉ. प्रिया दत्ता, शास्त्रीय गायक पंकज प्रधान, रेडियो जाकी जूही मोहन, राज कुमार बहूरूपिया, आशीष शर्मा ते सोहम गुप्ता बी मजूद हे। नाटकें दे अलावा इस आयोजन च शास्त्रीय संगीत ते नृत्य दियां क्लासां, बच्चें लेई थिएटर ते इस चाल्ली दियां होर केई गतिविधियां शामिल न।

<><><><><><>